

সিনিয়র রিপোর্টার | জাতীয় | 27 May, 2025

আইনশৃঙ্খলা রক্ষাকারী বাহিনীর কড়া নিরাপত্তাব্যবস্থার মধ্যেই আজ মঙ্গলবার সচিবালয়ের ভেতরে বিক্ষোভ করছেন কর্মচারীরা।

পূর্বঘোষিত কর্মসূচি অনুযায়ী, আজ বেলা ১১টার পর কর্মচারীরা বিক্ষোভ শুরু করেন। ‘সরকারি চাকরি (সংশোধন) অধ্যাদেশ, ২০২৫’ প্রত্যাহারের দাবিতে কর্মচারীরা আজ টানা চতুর্থ দিনের মতো কর্মসূচি পালন করছেন।

দুপুর পৌনে ১২টার দিকে সচিবালয়ের ফটক থেকে ভেতরে দেখা যায়, বিপুলসংখ্যক কর্মচারী মিছিল নিয়ে মন্ত্রিপরিষদ বিভাগ ও জনপ্রশাসন মন্ত্রণালয়ের নতুন ভবনের সামনে যাচ্ছেন।

কর্মচারীদের বিক্ষোভ কর্মসূচিকে কেন্দ্র করে আজ সচিবালয়ে কড়া নিরাপত্তাব্যবস্থা নেওয়া হয়েছে।

আজ সকাল ১০টার দিকে দেখা যায়, সচিবালয়ের প্রধান ফটকে বিশেষায়িত বাহিনী সোয়াট মোতায়েন রয়েছে। এ ছাড়া সচিবালয়ের সামনে বিজিবি মোতায়েন দেখা গেছে।

সচিবালয়ের কর্মকর্তা-কর্মচারী ছাড়া কেউ ঢুকতে পারছেন না। অবশ্য গতকাল সোমবার স্বরাষ্ট্র মন্ত্রণালয় থেকে জানানো হয়েছিল, আজ সচিবালয়ে সব ধরনের দর্শনার্থীদের প্রবেশ বন্ধ থাকবে।

এমন অবস্থায় আজ সকাল থেকে সাংবাদিকদেরও সচিবালয়ে প্রবেশ করতে দেওয়া হচ্ছে না।

সচিবালয়ে দায়িত্বে থাকা পুলিশ সদস্যরা বলেন, সাংবাদিকদের প্রবেশের বিষয়ে আজ দুপুর ১২টার দিকে সিদ্ধান্ত হবে।

দাবি আদায়ে গতকাল টানা তৃতীয় দিনের মতো সচিবালয়ের ভেতরে বিক্ষোভ করেন বিভিন্ন মন্ত্রণালয় ও বিভাগের কর্মচারীরা। গতকাল তাঁরা ঘোষণা দেন, আজ আবার বিক্ষোভ মিছিল করবেন। একই সঙ্গে একই ধরনের কর্মসূচি পালনের জন্য সচিবালয়ের বাইরে সারা দেশের সরকারি দপ্তরের কর্মচারীদের প্রতি আহ্বান জানান তাঁরা।

এখন থেকে সচিবালয়ে কর্মরত কর্মচারীদের সব সংগঠন মিলে ‘বাংলাদেশ সচিবালয় কর্মকর্তা-কর্মচারী ঐক্য ফোরাম’ নামে কর্মসূচি চালিয়ে যাওয়ার ঘোষণা দেওয়া হয়েছে।

© 2025 TimesToday. All Rights Reserved.

Generated on 27 June, 2025 18:20

URL: <https://www.timestodaybd.com/public/national/3001313427>